



SINDIKAT METALACA FEDERACIJE BOSNE i HERCEGOVINE

Sarajevo, Obala Kulina bana 1

Tel./Fax.: ++ 387 33 20 01 76; 21 36 73, Email: info@smfbih.ba

Web: www.smfbih.ba

Broj: 01 - ~~///~~ -IV/24

Sarajevo, 26.04.2024.godine

SREDSTVIMA INFORMISANJA/MEDIJIMA

Predmet: Poziv na press konferenciju - Saopštenje za javnost povodom održavanja Prvomajske protestne šetnje Sindikata metalaca Federacije BiH (Sarajevo, 1. maj 2024. godine)

Poštovani novinari,

Prije svega, iskreno Vam se zahvaljujemo na **Vašem dosadašnjem**, nemjerljivom doprinosu u afirmaciji i korektnom izvještavanju našeg članstva i javnosti o radu i aktivnostima Sindikata metalaca.

Nadamo se da ćete nam pomoći i u obilježavanju ovog, za nas veoma bitnog dana, 1. MAJA 2024.godine, Međunarodnog praznika rada, prenoseći poruke i zahtjeve nadležnima kao i naše obraćanje članstvu, **te Vas pozivamo da medijski propratite našu Prvomajsku protestnu šetnju, koja u 10:00 sati kreće od Doma sindikata, prema Udruženju poslodavaca, do sjedišta Vlade Federacije, gdje će u velikoj Sali na prizemlju zgrade Energoinvesta biti održana i press konferencija sa početkom u 11:30 sati.**

Obrazloženje:

Drastičan i nezaustavljiv rast svih troškova života, odnosno veoma težak materijalni položaj metalčkih radnika nameće potrebu **HITNOG povećanja plata radnicima u metalckom sektoru, prvenstveno kroz povećanje najniže satnice u Granskom kolektivnom ugovoru!**

Potrošačka korpa duže od godinu dana iznosi skoro 3.000 KM.

Najniža satnica je zadnji put povećana 2022. godine, sa početkom primjene od 02. novembra 2022. godine. Rast cijena jede realne zarade radnika, koji sa sadašnjim platama imaju manju kupovnu moć nego prije godinu ili dvije. Prema podacima koje smo Udruženju poslodavaca dostavili na uvid, u zadnje četiri godine je četveročlana radnička porodica u kojoj jedan član radi i prima prosječnu platu u Federaciji, ostvarila „minus“ od preko 65.000 KM!

Radnici preživljavaju tako što se krpe kratkoročnim kreditima ili pozajmicama, ili rade još jedan ili dva posla u vrijeme kada bi se trebali odmarati od teškog rada. Ovakvo stanje je neodrživo.

Slijedom navedenog, Sindikat metalaca Federacije BiH je još u septembru prošle godine prema Udruženju poslodavaca Federacije BiH dostavio **zahtjev** za početak pregovora o povećanju najniže satnice u Granskom kolektivnom ugovoru. Do danas nije održan nijedan pregovarački sastanak, a Udruženje poslodavaca je krajem februara ove godine donijelo odluku da trenutno *ne postoje uslovi* za početak pregovora o izmjeni Granskog kolektivnog ugovora.

Upravni odbora Sindikata metalaca Federacije BiH je ovakav stav ocijenio neprihvatljivim, o čemu je Udruženje poslodavaca obaviješteno u pisanoj formi.

Nadalje, uprkos obećanjima da će Zakon o minimalnoj plati i set fiskalnih zakona (Zakon o porezu na dohodak i Zakon o doprinosima), koji bi omogućili značajnije povećanje plata svim radnicima, biti usvojeni i stupiti na snagu od 01. januara 2024. godine, isti do danas nisu usvojeni, niti je poznato u kojoj su fazi.

Imajući u vidu navedeno, u cilju iskazivanja nezadovoljstva radnika metalaca akteulnom situacijom i **javnog isticanja zahtjeva** da se hitno otvore pregovori o izmjeni Granskog kolektivnog ugovora, te da se hitno upute u parlamentarnu proceduru Zakon o minimalnoj plati i set fiskalnih zakona (Zakon o porezu na dohodak i Zakon o doprinosima), donesena je odluka o održavanju Prvomajske protestne šetnje.

1.



GLAVNI ZAHTJEVI SINDIKATA METALACA FEDERACIJE BIH:

- 1. Povećanje najniže neto satnice u Granskom kolektivnom ugovoru za metalni sektor sa 4,40 na 5,68 KM;**
- 2. Hitno upućivanje u proceduru i donošenje Zakona o minimalnoj plati, te Zakona o doprinosima i Zakona o porezu na dohodak koji će značajno umanjiti poreske obaveze i omogućiti povećanje plata svim radnicima.**

Ukoliko zahtjevi Sindikata metalaca ne budu ispunjeni u razumnom roku, Upravni odbor SM FBiH će razmotriti i donijeti odluku o narednim sindikalnim aktivnostima, uključujući i mogućnost generalnog štrajka na nivou grane metala u Federaciji BiH!

Srdačno Vas pozdravljamo i radujemo se Vašem dolasku!

Trasa kretanja:

Protestni skup će biti održan u srijedu, 01. maja 2024. godine u periodu od 10:00 sati do 13:00 sati. Okupljanje će biti na TRG-u PRVOG KORPUSA ARMIJE REPUBLIKE BOSNE I HERCEGOVINE gdje će se položiti cvijeće na spomen obilježje Đure Đakovića. Dalje, učesnici protesta će se kretati desnom stranom trotura pored zgrade Vlade Kantona Sarajevo u ulici Reisa Džemaludina Čauševića do raskrsnice ulice Hamze Hume br. 2 (pješački prelaz od Ali-pašine džamije prema knjižari Sarajevo Publishing).

Nastavak kretanja desnom stranom ulice Hamze Hume br. 2, pored Doma zdravlja Vrazova do zgrade u kojoj je smješteno Udruženje poslodavaca FBiH (Ulica Maršala Tita broj 6.). Tu se skupina zaustavlja i isticanjem zahtjeva simbolično obraća Udruženju poslodavaca. Nakon isticanja zahtjeva UP FBiH skupina nastavlja kretanje do pješačkog prelaza koji vodi na desnu stranu glavne saobraćajnice (kod Hotela Zagreb) u ulicu Zmaja od Bosne. Nastavak kretanja je desnom stranom Ulice Zmaja od Bosne do raskrsnice u Pofalićima, ulica Hamdije Čemerlića, sve do zgrade Vlade FBiH.

Prije nego što se dostave zahtjevi Vladi FBiH, položiti će se cvijeće na spomen obilježje Emerik Blumu ispred zgrade Energoinvesta. Skupina se zaustavlja na trotuaru ispred zgrade Vlade FBiH gdje će se skupu obratiti predsjednik. Nakon obraćanja predsjednika biće upričena pres konferencija za novinare u zgradi Energoinvest, d.d. Sarajevo u Sali tzv radničkog savjeta. Nakon završetka pres konferencije skup se razilazi.

Mjesto polaska: TRG PRVOG KORPUSA ARMIJE REPUBLIKE BOSNE I HERCEGOVINE, ispred zgrade Doma sindikata.

Mjesto završetka: Zgrada Vlade FBiH.

ZAJEDNO SMO JAČIIII



PREDsjedNIK SM FBiH
Almir Salihović

Dostavljeno:

- Naslovu;
- a/a

